

# Kontuola

ANTZUOLA / Egubakoitza / 2004eko urriaren 22a / 219. zenbakia

KOORDINATZAILEA: Aintzane Irizar • Barrenkalea 33 20570 BERGARA • Tel.: 943 76 03 97 • Faxa: 943 76 29 77 • Posta elektronikoa: kontuola@goiena.com • Lege gordailua: SS1179/02

## Lasterkaldiaren irteerara joateko autobusa antolatu du Udalak

AINTZANE IRIZAR

Datorren egubakoitzean, hilak 29, hasiko den Lasterkaldira ia dena prest dute antolatzaileek. Aiherrara joateko Udalak jarri duen autobuserako eta zapatuan Udal Pilotalekuan egingo den herri bazkarirako izena emateko epea dagoeneko zabalik dago.

Egubakoitzean, hilak 29, Aiherran hasi eta hurrengo egunean, zapatua, iritsiko da Lasterkaldia Antzuolara. 20:00etan irtengo dira lehenengo korrikalariak Aiherratik; baina, ekitaldiak 18:00etan hasiko dituzte; txalapartariak, joaldunak eta eskolako umeen kantu saioa izango da ordu horretan. 19:30ean, senidetzearen sinatze ekitaldia egingo dute herri bietako udal ordezkariak.

Kilometro zehar, korrikalariak lekukoa pasatuko diote bata besteari; Joseba Gastiainek egin du lekuko hori. Aiherrako ume batek eta Antzuolako pertsona heldu batek eramango dute lekukoa lehenengo kilometroan. Azkenekoan, berriz, Antzuolako ume batek eta Aiherrako nagusi batek. Oraindik ez dute zehaztu zeintzuk izango diren lau lagun horiek. Lekukoak idatzi bat ekarriko du barruan, eta Antzuolan irakurriko dute, Lasterkaldia amaitzen denean.

### AUTOBUSA ETA HERRI BAZKARIA

Aiherrara joateko autobusa antolatu du Udalak. 16:00etan irtengo da Sagastin, eta 21:00etan itzuli-ko da. Joan nahi dutenek hilaren 25era arte dute izena emateko aukera, udaletxean eta liburutegian. Doan izango da autobusa. Zapatuan, berriz, herri bazkaria egongo da frontoian; txartelak salgai daude herriko tabernetan, udaletxean eta liburutegian, hilaren 25era arte. Nagusiek 10 euro ordaindu beharko dute; 12 urte-tik beherakoek, berriz, 5 euro.

Bestalde, aipatzekoa da kamisetak egin dituztela antolatzaileek. Bederatzi eurotan daude salgai, udaletxean eta liburutegian. Gaur, egubakoitza eta bihar Zurratègin jarriko dituzte salgai, 18:00etatik 20:00etara.



Astlehenean, hilak 18, Baionan egin zuten prentsaurrekoa Aiherrako eta Antzuolako ordezkariak.

### KORRIKALARIAK PREST

Lasterkaldiak 150 kilometro inguru izango ditu; antolatzaileen esanetan, dagoeneko antolatuta dute kilometro bakoitza zeinek egingo duen. Baina, taldeak eginda dituzten arren, oraindik baduzue parte hartzeko aukera. Korri-

ka eginez parte hartu nahi baduzue, udaletxera jo dezakezue eta Amaia Zabaleta kirol teknikariarekin berba egin. Antolatzaileek nahi dutena da ahalik eta herritar gehienek parte hartzea datorren asteburuko ekitaldian. Gainera, kontuan hartu eza-

zue kilometro bakoitza zazpi minutuan egingo dutela, ia edozeinek egiteko moduko martxan.

Bukatzeko, aipatzekoa da ospakizun hauek antolatzeko eraturako batzordean herriko elkar-te eta talde gehienek eta herritar askok parte hartu dutela.

## Egitaraua

### Urriak 28, eguena

- 19:00: Daniel Landart-en berbaldea, Olanan.

### Urriak 29, egubakoitza

- 16:00: Aiherrara joateko autobusa, Sagastin.
- 18:00: Aiherran, txalapartariak, joaldunak eta herriko eskolako umeen kantu saioa.
- 19:30: Aiherrako eta Antzuolako udalen arteko hitzarmena sinatzea.
- 20:00: Lasterkaldiaren irteera.

### Urriak 30, zapatua

- 11:00: Lasterkaldia Antzuolara iritsiko da.

Azkeneko kilometroa, San Blasetik Herriko Plazara, aihertarrek eta antzularrek elkarrekin egingo dute. Ondoren, lekukoak barruan dakarren agiria irakurriko dute.

- 14:00: Herri bazkaria, frontoian. Bazkalostean, dantzak, bertsoak, trikitalariak eta kantu saioa Beñat Elizondo eta bere taldearekin.

- 19:00: Gaztaina erre jana, Herriko Plazan.

### Urriak 30 eta 31

- 12:00-14:00 eta 18:30-20:00: Senidetzearen gaineko erakusketa, Olanan.

## LABUR

### Herriko pilota txapelketan izena emateko aukera

Olalde elkarteak, urteroko moduan, Herri Mailako Eskuz Binakako Pilota Txapelketa antolatu du. Izena emateko epea urriaren 15era arte zegoen zabalik, baina, epe hori luzatzea erabaki dute. Dimekan, hilak 24, izango duzue izena emateko azkeneko aukera. Horretarako, Josu Zabalo, Juan Simon Aristi, Balentin Zabalo edo Juan Tomas Erostegirengana jo dezakezue.

### Argazkiak aurkezteko aukera urriaren 29ra arte

Udalak antolatutako argazki lehiaketara lanak aurkezteko epea datorren asteko egubakoitzean, hilak 29, bukatuko da. Argazkien gaia libre da eta edozein herritarrek du parte hartzeko aukera.

Aurten, gainera, berrikuntza batekin datorkigu lehiaketa; argazkiak e-postaz bidaltzeko aukera eskaintzen digute, honako helbidera: [kultura@antzuola.net](mailto:kultura@antzuola.net)

## KIROLA

### PARTIDUAK

#### FUTBOLA

Urriak 23  
12:00: Antzuola-Elgoibar (Neskak)  
16:30: Antzuola-Eibartarrak (Gazteak)

#### PILOTA

Urriak 23 (Gipuzkoako Txap.)  
17:30: Olalde-Guretxeru (Kadeteak)

### EMAITZAK

#### FUTBOLA

Amara Berri 3 Antzuola 1 (Gazteak)  
Antzuola 3 Ikasberri 4 (Kadeteak)  
Bergara 3 Antzuola 0 (Neskak)

#### PILOTA

Gipuzkoako Kluben Arteko Txap.  
Olalde-Eskoriatza (eskuz nag.) - 18-22  
Añorga-Olalde (eskuz kadeteak) - 22-5

HIRIGINTZA

# Zirkulazioaren noranzkoak aldatu egingo dituzte datozen asteotan

AINZANE IRIZAR

Aurreko astetik dihardute herri barruko lurreko bide seinaleak margotzen. Zutikako zirkulazio seinaleak ere jarriko dituzte. Lan horiek amaitzen dituztenean, aldaketa handiak egingo dituzte herri barruko zirkulazioan; noranzkoak, hain zuzen ere, aldatuko dituzte.

Aldaketa handiak egingo dituzte datozen asteotan herri barruko zirkulazioan. Horretarako, eta gaur egun dauden seinaleak berri-izeko, hainbat lan egiten dihardute aurreko astetik: lurreko bide seinaleak margotzen hasi ziren aurreko astean, eta zutikako seinale berriak ere jarriko dituzte.

Aldaketa nabarmenena izango da Kalebarrenen, Santiago-

neko kantoian, hasi eta Kalegoiraino noranzko bakarra ezarriko dutela, behetik gorako noranzkoa, hain justu. Hortaz, Kalegoitik behera joateko, orain bezala, Sagasti auzotik pasatu beharko dugu. Herriko Plazara iristeko aukera bakarra, berriz, Kalebarrendik pasatzea izango da. Izan ere, Olanen etxe ondotik behera joaterik ere ez dugu izango; bide hori gora joateko bakarrik erabili ahal izango dugu.

Bestalde, Sagastitik Kalegoirako bidea zabaldu egingo dute; orain arte, kontrako noranzkoan bakarrik egon da zabalik bide hori. Beste aldaketa batzuk ere egingo dituzte: besteak beste, frontoitik Kalebarrenerako bidea erabat itxiko dute eta frontoiko pasealekuak eskola alderako noranzkoa bakarrik izango du.



Kalebarrenetik Kalegoiraino, behetik gorako noranzkoa bakarrik izango du bideak.

LABUR

## Tortilla lehiaketa azarora atzeratzea erabaki dute

Bihar, zapatua, egitekoak ziren tortilla lehiaketa. Azkenean, baina, ekitaldi hori bertan behera lagatzea erabaki dute, hainbat arrazoi direla eta. Udaleko arduradunek jakinarazi digutenez, datorren hilabetean, azaroan, egingo dute lehiaketa hori.

## Aitor Mendizabal pilotaria Burlatako txapelketan

Aitor Mendizabalek, Olalde elkarte kadete mailako pilotariak, Burlatako pilota txapelketa jokatzeko dihardu. Oñatiko pilotari bat du bikoite kide txapelketa horretan. Aurreko asteburuan jokatu zuten partidua irabazi egin zuten.

ERRETIRATUAK

# Hamabostaldi Kulturalaren barruan, ibilaldia Antzuolan

AINZANE IRIZAR

Antzuolako eta Bergarako erretiratuen elkarteek, urtero bezala, Hamabostaldi Kulturala antolatu dute aurten ere. Oraingo astean ekin diete ekitaldiei, eta urriaren 30ean, amaituko da kultur ekitaldi sorta, herri bazkari batekin.

Gizartearen joerak eta bilakaera. Etorkizuna eta edadetuak da aurtengo hamabostaldiaren leloa. Horren inguruan, ekitaldi ugari antolatu dute erretiratuek; astelehenean, hilak 18, hasi zuten hamabostaldia eta hilaren 30ean amaituko dute. Gaur, egubakoitza, gazteen eta zaharren arteko musika emanaldia izango dugu, 19:30ean, Mariaren Lagundiko elizan. Hantxe parte hartuko dute

San Joxepeko abesbatzak; Bergarako Musika Eskolako Abesbatzak eta Akordeoi Orkestrak eta Migel Sagastume soinu-joleak.

Bihar, zapatua, belaunaldien arteko xake txapelketa jokatu dute, 16:00etan, San Joxepe elkartean. Datorren asteko martitzenean, hilak 26, teknologia berriek gure bizimoduan duten eraginaren gainean berbaldea egingo du Gorka Eizmendik, Fatronik fundazioko ingeniariak. Migel Altuna institutuko areto nagusian izango da berbaldea, 19:30ean.

Eguaztenean, urriak 27, irteera egingo dute erretiratuek; Errioxara joango dira, San Millan de la Cogollara, hain zuzen ere. Yuso eta Suso monasterioak bisitatuko dituzte, besteak beste.


Hurrengo egunean, hilak 28, beste berbaldi bat izango dute,

Medikuntza eta osasun arloko aurrerapenak: bizi kalitatearen bermea al dira? izenburupean. Xabier Ibarzabal medikuak egingo du berba, Migel Altuna institutuko areto nagusian, 19:30ean.

Urriaren 29an, egubakoitza, Antzuolako eta Bergarako ikasleek belaunaldien arteko harremanen gainean egindako lanak aurkeztuko dituzte. Urriaren 30ean, zapatua, amaituko dute aurtengo hamabostaldia, herri bazkari batekin.

### ANTZUOLAN ERE HAINBAT EKITALDI

Oraingo asteburuan Antzuola eta Bergarako erretiratuek egindako eskulan eta margolanen erakusketa egongo da Olanen etxean. Astelehenean, berriz, hilak 25, Antzuolan bisita gidatua egingo dute alde zaharrean eta berrian.



## Taxi gidari berria dugu herrian

Gorka Garai eskoriatzarra dugu herriko taxi gidari berria. Orain dela hilabete inguru hasi zen Antzuolan lanean eta gustura dabil, kontatu digunez. Jesus Mari Fernandezek postua libre laga zuen duela gutxi eta haren tokia hartu du Gorkak. Horrela, bi taxi ditugu berriro herrian; Gorkarekin batera, Antonio Fernandez da herriko beste taxi gidaria./A.I.

**DANBAKA**))))))

DEBAGOIENEN I. MUSIKA LEHIAKETA

# SMS MEZUAK

Gustukoen duzun talde, bakarlari edo abestiari lagunduz, zuk ere saria irabazi!

Mezuak bidaltzeko jarri:

**DANBAKA (tartea) PARTAIDEAREN IZENA eta bidali 7744 zenbakira.**

Mezu bakoitzaren kostua 0,9+BEZa.

